



DEPUTACIÓN PROVINCIAL
A CORUÑA
SERVIZO DE PATRIMONIO E CONTRATACIÓN



Número

62

/ 2025

CONVENIO DE COLABORACIÓN ENTRE A DEPUTACIÓN PROVINCIAL DA CORUÑA E A ASOCIACIÓN CLÚSTER AUDIOVISUAL GALEGO PARA O FINANCIAMENTO DO PROXECTO “PROMOCIÓN DO SECTOR AUDIOVISUAL GALEGO E CONSOLIDACIÓN DA CORUÑA COMO POLO AUDIOVISUAL DE REFERENCIA NO ÁMBITO NACIONAL E INTERNACIONAL”

Na Coruña, a 28 de xullo de 2025 na sede da Deputación Provincial da Coruña

Ante min, Miguel Iglesias Martínez, Secretario Xeral da Deputación Provincial da Coruña, como fedatario actuante

REUNIDOS

Dunha parte, Dona Rosa Ana García López, en representación da Deputación Provincial da Coruña

Doutra parte, Don Alfonso Blanco Bembibre, en representación do Clúster do Audiovisual Galego.

Actuando no exercicio dos seus respectivos cargos e na representación que ostentan, e recoñecéndose reciprocamente capacidade para obrigarse nos termos deste documento

MANIFESTAN

1.- A Asociación Clúster do Audiovisual Galego (en adiante o Clúster) é unha asociación empresarial sen ánimo de lucro, que reúne a empresas tractoras da industria de contidos dixitais e audiovisuais en Galicia que participan en todos os procesos da cadea de valor da produción audiovisual.

Toda a súa actividade baséase na colaboración entre os axentes do sector para xerar valor engadido para aumentar o seu volume de negocio a través de sinerxias para desenvolver Proxectos empresariais que convertan a Galicia nun referente na industria audiovisual.

Baixo un enfoque colaborativo, o Clúster reúne a máis de cen empresas, entidades e institucións que abarcan toda a cadea de valor do sector, desde produtoras e distribuidoras ata tecnolóxicas e de formación. A entidade está consolidada como un actor clave no panorama audiovisual galego, liderando a promoción do sector audiovisual, ao contar cunha ampla traxectoria nel e un profundo coñecemento do mesmo. O Clúster conta ademais cunha ampla experiencia na promoción do sector a

nivel nacional e internacional e na participación activa en eventos e plataformas de referencia, así como na execución eficaz de proxectos innovadores.

O seu principal obxectivo reside en potenciar a competitividade do sector audiovisual galego, impulsando a súa internacionalización e facilitando a colaboración entre os seus membros. Para iso, o Clúster desenvolve unha ampla gama de actividades que abarcan diversos ámbitos:

- **Internacionalización:** promoción da marca “Galicia Audiovisual” no extranxeiro, participación en feiras e mercados internacionais, desenvolvemento de programas de intercambio e captación de inversións.
- **Innovación:** fomento da I+D+I no sector audiovisual, apoio ao desenvolvemento de novas tecnoloxías e creación dun ecosistema emprendedor.
- **Formación:** implementación de programas de formación especializada para profesionais do sector, organización de talleres, xornadas e seminarios.
- **Promoción:** difusión do talento audiovisual galego a nivel nacional e internacional, organización de eventos e actividades de networking.

2.- A Deputación da Coruña está a desenvolver o proxecto Ecosistema Dixital do Sector Audiovisual de Galicia (EDAGA). Coruña Estudio Inmersivo (CEI), no marco da convocatoria de axudas no ámbito da Sociedade da Información para a creación dun ecosistema dixital no sector audiovisual, segundo o disposto na Orde ETD/677/2022, de 14 de xullo.

A través do proxecto, a entidade provincial está a construír na cidade das TIC, un estudio virtual de última xeración (plató virtual VPxR), como elemento revulsivo e dinamizador do emprego, en especial dentro do sector audiovisual. Por medio do estudio virtual as empresas do sector audiovisual galego e doutras comunidades poderán desenvolver cos máis sofisticados sistemas tecnolóxicos, a súa creatividade e a produción de grandes películas nas mellores condicións de calidade, innovación e tecnoloxía.

Con esta iniciativa, a Deputación quere impulsar e apoiar o sector audiovisual galego, contribuír á súa modernización e competitividade, así como fomentar a creación de emprego e de empresas en sectores estratéxicos e innovadores como é o audiovisual.

3.- Dado o interese coincidente da Deputación da Coruña e a Asociación Clúster do Audiovisual Galego no marco dos seus fins e competencias, ambas as dúas partes

ACORDAN

Formalizar o presente CONVENIO DE COLABORACIÓN conforme ás seguintes cláusulas:

I.- OBXECTO

O presente convenio ten por obxecto establecer as bases de colaboración entre a Deputación da Coruña e a Asociación Clúster do Audiovisual Galego, CIF G15891260, para o financiamento do proxecto “**PROMOCIÓN DO SECTOR AUDIOVISUAL GALEGO E CONSOLIDACIÓN DA CORUÑA COMO POLO AUDIOVISUAL DE REFERENCIA NO ÁMBITO NACIONAL DE INTERNACIONAL**”, para contribuír a converter Galicia e en especial a provincia da Coruña, nun referente no sector audiovisual, promocionando a súa modernización, creatividade, produción e competitividade nos mercados nacionais e internacionais,

A finalidade última é contribuír ao desenvolvemento socioeconómico da provincia, mediante a posta en valor dun sector estratéxico, moderno e innovador, en alza na provincia da Coruña, capaz de crear emprego cualificado e de calidade e de atraer empresas de nivel nacional e internacional, así como de crear outras novas que convirían a nosa provincia nun referente do sector audiovisual.

II.- ORZAMENTO DE GASTOS DAS ACTIVIDADES A REALIZAR

O Clúster levará a cabo as actividades programadas, segundo se definen na cláusula anterior, consonte ao seguinte orzamento:

ACTIVIDADES	Orzamento
1. GASTOS DE PERSOAL IMPUTADO AO PROXECTO	28.800,00 €
Soldos e salarios:	21.737,64 €
1 Directora e 1 Técnica de proxecto do CLAG (94% imputación)	21.737,64 €
Seguridade Social a cargo da entidade:	7.062,36 €
1 Directora e 1 Técnica de proxecto do CLAG (94% imputación)	7.062,36 €
2. CONTRATACIÓNS EXTERNAS	166.165,30 €
Promoción do sector audiovisual galego e presenza en eventos de referencia nacional e internacional:	69.478,00 €
Congreso Internacional de Animación, VFX, VP e Nuevos Media, Mundos Digitales 2024	50.000,00 €
Congreso Internacional de Animación, VFX, VP e Nuevos Media, Mundos Digitales 2025	5.000,00 €
IBERSERIES 2025	8.500,00 €
I+P, Ideas para Producir 2024	5.978,00 €
Desenvolvemento Imaxe Corporativa CEI	10.904,30 €
Elaboración de elementos/ pezas audiovisuais para a promoción e difusión plató virtual VpxR Vídeo promocional e pezas audiovisuais	39.800,00 €
Asesoramento técnico para o deseño de accións de promoción: Contratación de profesionais independentes para o deseño das accións de promoción	19.500,00 €
Formación en produción virtual (2 edicións curso Producción Virtual/10 alumnos/a por edición). Honorarios docentes	26.483,00 €
3. PUBLICIDADE E PROPAGANDA	51.500,00 €
Comunicacións e insercións publicitarias para evento Marché du Film 2025	14.000,00 €
Comunicación e insercións publicitarias para evento San Sebastián Internacional Film Festival 2025	12.000,00 €
Comunicación e insercións publicitarias para evento MIPCOM 2025	14.000,00 €
Presencia en medios en campaña de publicidade transversal e cobertura en notas de prensa: Mundos Digitales 2025, Iberseries 2025, Shooting Locations Marketplace 2025, Focus Londres 2025	10.000,00 €
Publicidade impresa no programa Iberseries 2025	1.500,00 €

4. DESPRAZAMENTOS	5.335,25 €
I+D Ideas para Producir 2024	5.335,25 €
5. OUTROS GASTOS FINANCIEROS	3.000,00 €
Constitución de fianza, aval ou garantía anticipo axuda	3.000,00 €
6. ARRENDAMENTOS	0,00 €
Alugueiro do espazo no Festival Internacional de San Sebastián	0,00 €
7. GASTOS CORRENTES	20.085,00 €
Comunicacións e subministracións	20.085,00 €
ORZAMENTO	274.885,55 €

III.- FINANCIAMENTO PROVINCIAL E OUTROS INGRESOS QUE SE OBTENAN OU ACHEGUEN PARA A MESMA FINALIDADE

1. A Deputación da Coruña contribuirá ao financiamento da actividade, tal e como se define na cláusula primeira, por importe de **244.647,65€** o que representa unha porcentaxe do 89,00%. No caso de que o gasto xustificado non acadase o importe total previsto na cláusula segunda, a Deputación só achegará o importe que represente o 89,00% da cantidade efectivamente xustificada. A contía restante, ata acadar o importe total do orzamento da actividade, está financiado con cargo a recursos propios do Clúster acreditando a entidade beneficiaria que ten consignado o crédito adecuado e suficiente para imputar a totalidade do gasto imputable á entidade.

2. Agora ben, se a cantidade xustificada resulta inferior ao 75 por cento% do orzamento previsto na cláusula segunda, entenderase que a finalidade básica da subvención non foi cumprida e perderase o dereito ao cobro da mesma.

3. O importe do financiamento provincial farase efectivo con cargo á aplicación orzamentaria 0520/92052/481, na que a Intervención provincial ten certificado que existe crédito dabondo sobre a que se ten contabilizado a correspondente retención de crédito.

4. Para a anualidade corrente existe crédito dabondo polo importe indicado, tal e como consta no certificado de existencia de crédito emitido pola Intervención provincial. Con respecto ás anualidades futuras, advírteselle ao Clúster de que o compromiso de gasto queda condicionado á efectiva aprobación do orzamento para o dito ano e a que nel existe dotación orzamentaria adecuada e suficiente para afrontar o gasto.

5. A subvención da Deputación é compatible coa percepción doutras subvencións ou axudas, públicas ou privadas, que a entidade beneficiaria obteña para a mesma finalidade, sempre que o seu importe, xuntamente co da subvención provincial, non supere en ningún caso o importe total do gasto efectivamente xustificado.

6. No caso de que a concorrencia de axudas ou subvencións supere o importe do gasto efectivamente xustificado, minorarase a achega provincial no importe necesario para darlle estrito cumprimento ao apartado anterior.

IV.- CONTRATACIÓN E EXECUCIÓN

1. O outorgamento dos contratos de servizos, asistencia ou subministros necesarios para a execución da actividade corresponderalle ao Clúster. Non se poderá contratar a realización de prestacións con persoas ou entidades vinculadas ao Clúster, nin con

calquera outra na que concorran algunha das circunstancias ás que se refire o artigo 29.7 da Lei 38/2003, de 17 de novembro, xeral de subvencións.

2. A contratación cos terceiros para a execución dos servizos, asistencia ou subministrados necesarios realizarase con suxección ás normas de contratación do sector público, utilizando para tal fin os Pregos de condicións tipo da Deputación provincial para os procedementos abertos e garantindo, en todo caso, os principios de publicidade, concorrência, igualdade e non discriminación. Procederá a utilización dos criterios e do prego provincial do procedemento negociado cando razóns de carácter científico, literario ou artístico dificulten ou impidan promover a concorrência.

No procedemento de contratación deberá participar un funcionario provincial, designado polo Presidente da Corporación, que formará parte da Comisión técnica que evalúe as ofertas dos licitadores.

V.- PUBLICIDADE DO FINANCIAMENTO PROVINCIAL

1. Na publicidade pola que se de a coñecer a realización das actividades, ben sexa por medios escritos, radiofónicos, audiovisuais ou internet, deberase facer constar sempre o financiamento da Deputación Provincial da Coruña e se utilizará o logotipo da Deputación da Coruña, dispoñible na páxina web <https://www.dacoruna.gal/documentacion/logos/logotipos>

2. Coa memoria e conta xustificativa achegaranse os documentos que acrediten o cumprimento destas obrigas do Clúster.

VI.- XUSTIFICACIÓN NECESARIA PARA RECIBIR A ACHEGA PROVINCIAL

1. Coa posibilidade prevista no disposto na Base 54 das Bases de execución do orzamento para o ano 2024, as achegas provinciais faranse efectivas despois da xustificación documental da realización das actividades ou investimentos subvencionados. Só de forma excepcional e debidamente motivada poderán librarse fondos anticipados que, en todo caso, deberán aterse ás seguintes normas:

a) Requirirase a previa constitución de fianza, aval ou garantía suficiente, polo importe total da cantidade anticipada máis un 20 por 100 en concepto de posibles intereses moratorios, excepto as entidades exentas por lei da prestación de garantías ou caucións.

b) Deberá acreditarse que o beneficiario está ao corrente das súas obrigas coa facenda pública, coa Deputación e coa Tesourería da Seguridade Social.

c) Non será posible expedir un pago anticipado se o beneficiario ten pendente de xustificación unha cantidade anticipada con anterioridade, e logro de transcorrer o prazo de xustificación disposto, non se achegou a documentación xustificativa da aplicación total dos fondos anticipados nas condicións establecidas no acordo ou convenio correspondente.

d) En todo caso será tamén de aplicación o previsto no artigo 27.3 e 4 da Ordenanza xeral de subvencións e transferencias desta Deputación (publicada no BOP número 150 do 10 de agosto de 2021)

Pola súa parte, no artigo 27 da Ordenanza xeral de subvencións e transferencias indícase:

“3. Cando a natureza da subvención así o xustifique e co fin de non xerar dificultades de liquidez ás persoas beneficiarias, poderán realizarse pagamentos anticipados de ata o 50

por 100 do importe da subvención concedida, debendo a persoa beneficiaria achegar previamente a garantía correspondente, nos termos establecidos regulamentariamente; non obstante, estarán exentas de presentar garantía as administracións públicas e as entidades ás que se lles subvencione a realización de proxectos de cooperación internacional. En todo caso, o custo da garantía poderá ser considerado gasto subvencionable”.

De acordo co anterior, poderase expedir un primeiro pagamento a prol do Clúster, pola contía resultante de aplicar a dita porcentaxe sobre o importe da subvención concedida, tendo en conta o exposto anteriormente e unha vez que presente ou conste na Deputación provincial a seguinte documentación:

- Certificación do acordo ou acordos de contratación de persoal e de adxudicación definitiva dos contratos de subministracións ou servizos necesarios para levar a cabo a actividade, na que se fagan constar polo menos os seguintes datos: empresa adxudicataria, importe do contrato e prazo de execución.
- Acreditación do cumprimento das obrigas tributarias e coa Seguridade Social, segundo o disposto na cláusula OITAVA.
- Declaración doutras axudas ou subvencións solicitadas ou concedidas para a mesma finalidade.
- O Clúster estará obrigado a cumprir a cláusula de publicidade e a acreditala mediante a presentación dos documentos que o acrediten.

2. Rematada completamente a realización da actividade, procederase ao aboamento do 50 por cento restante, unha vez que se presente ou conste na Deputación provincial a seguinte documentación:

- Memoria de actuación, subscrita polo representante legal do Clúster, xustificativa do cumprimento das condicións impostas neste convenio, coa indicación das actividades realizadas e dos resultados obtidos.
- Relación clasificada dos gastos realizados, na que se indiquen os acredores co seu NIF, os documentos xustificativos, os importes e, no seu caso, datas de pago. Tamén se indicarán as desviacións con respecto ao orzamento detallado na cláusula SEGUNDA. Con esta relación achegaranse os orixinais ou copias debidamente compulsadas das facturas e demais xustificantes de gasto. No caso de que se presenten copias compulsadas, con carácter previo á compulsa deberá estenderse unha dilixencia sobre o orixinal na que se deixe constancia de que foi presentada como xustificante de gasto para o cobro dunha subvención outorgada pola Deputación da Coruña.
- Certificación da aprobación das facturas e demais documentos xustificativos polo órgano competente.
- Deberá acreditar o pago efectivo aos terceiros do importe aboado co primeiro prepagable.

3. O aboamento da subvención materializarase mediante o ingreso en conta da entidade financeira indicada polo Clúster na documentación achegada, no prazo de catro meses desde que presentara completamente a documentación xustificativa.

VII. TERMO PARA A REALIZACIÓN DA ACTIVIDADE E PRAZO DE XUSTIFICACIÓN

1. As actividades que son obxecto de financiamento provincial, realizaranse entre o **1 de xullo de 2024 e o 31 de decembro de 2025**.

2. Unha vez rematadas as actividades, o Clúster deberá presentar a xustificación documental á que se refire a cláusula SEXTA, no prazo máximo DUN MES antes do

vencemento do período de vixencia do convenio establecido na cláusula DÉCIMO TERCEIRA.

3. De conformidade co disposto no artigo 70.3 do Regulamento da Lei de subvencións (Real decreto 887/2006, do 21 de xullo), transcorrido este derradeiro prazo sen que se teña recibido xustificación ningunha, a Unidade xestora remitiralle un requirimento ao Clúster para que a presente no prazo improrrogable de QUINCE DÍAS. A falla de xustificación da subvención neste prazo excepcional dará lugar á perda da subvención e demais responsabilidades previstas neste convenio e na lexislación aplicable ao respecto. Aínda así, a presentación da xustificación neste prazo adicional non eximirá ao Clúster da sanción que, de conformidade co disposto na Lei de subvencións e nas Bases de Execución do Orzamento da Deputación, poida corresponderlle.

4. O aboamento da subvención materializarase mediante ingreso na conta da entidade financeira indicada polo Clúster na documentación achegada. E se tiveran transcorrido máis de catro meses desde a axeitada e correcta xustificación dos compromisos adquiridos sen que tivera cobrado o importe que lle corresponda, o Clúster terá dereito ao abono dos xuros de mora, ao tipo de xuro legal, que se devenguen desde a finalización do prazo de catro meses ata o momento no que se faga efectivo o pagamento.

VIII.- ACREDITACIÓN DO CUMPRIMENTO DAS OBRIGAS TRIBUTARIAS E COA SEGURIDADE SOCIAL

1. O Clúster deberá estar ao día, con carácter previo á sinatura deste convenio, e logo, con carácter previo ao pago da subvención, que se atopa ao día no cumprimento das obrigas tributarias coa Administración do Estado, coa Comunidade autónoma e coa Seguridade Social. E para tal fin poderá autorizar á Deputación a que obteña telematicamente os correspondentes certificados.

2. A acreditación do cumprimento das obrigas tributarias coa Deputación Provincial determinarase de oficio por esta.

IX.- DESTINO E MANEXO DOS FONDOS RECIBIDOS

1. O Clúster destinará os fondos recibidos ao pagamento dos xustificantes de gasto presentados.

2. Co fin de garantir un adecuado control da aplicación dos fondos, o pagamento deberá quedar acreditado documentalmente mediante a utilización de transferencia bancaria, tarxeta de débito ou crédito, cheque nominativo ou calquera outro medio que deixe constancia da data de pago e da identidade do perceptor. Só excepcionalmente se poderá realizar o pago en metálico para gastos de ata 150,00€, nos que non resulte posible a utilización dun dos medios anteriormente indicados.

3. Sen prexuízo dos libros e rexistros contables que as normas xerais ou sectoriais lle poidan impoñer, o Clúster deberá contar alomenos cun rexistro cronolóxico de cobros e pagamentos nos que se inclúan, entre outros, os relativos aos gastos xustificadas e aos ingresos declarados con respecto a esta subvención.

X.- CONTROL FINANCEIRO DA DEPUTACIÓN E DOS ÓRGANOS DE CONTROL EXTERNO

1. Consonte ao disposto nos artigos 44 e seguintes da Lei 38/2003, do 17 de novembro, xeral de subvencións, e nos artigos 41 e seguintes da Lei 9/2007, do 13 de xuño, de subvencións de Galicia, o Clúster poderá ser escollido pola Intervención provincial para a

realización dun control financeiro sobre a subvención pagada, co fin de acreditar a efectiva aplicación dos fondos á finalidade para a que foron concedidos, o correcto financiamento da actividade e o cumprimento de todas as demais obrigas formais e materiais que lle impón o presente convenio de colaboración.

2. Asemade, de acordo co disposto na Lei 6/1985, do 24 de xuño, do Consello de Contas de Galicia, o Clúster queda sometido aos procedementos de fiscalización que leven a cabo o Consello de Contas de Galicia ou, no seu caso, segundo o disposto na Lei orgánica 2/1982, do 12 de maio, aos procedementos de axuízamento contable que poida incoar o Tribunal de Contas, e a calquera outro órgano de control, nacional ou europeo.

XI.- REINTEGRO, INFRACCIÓNS E SANCIÓNS

1. O incumprimento dalgunha das cláusulas previstas no presente convenio de colaboración poderá dar lugar a obriga de reintegro parcial ou total dos fondos recibidos, así como ao pago dos xuros de demora que se devindiquen desde o día no que se realizou o pago ata o momento no que se acorde a procedencia do reintegro. O procedemento de reintegro iniciárase de oficio na súa tramitación seguirase o disposto nos artigos 41 e seguintes do seu Regulamento (R.D. 887/2006, do 21 de xullo), dándolle en todo caso audiencia ao interesado.

2. Sen prexuízo do anterior, o dito incumprimento tamén poderá ser constitutivo dalgunha das infraccións tipificadas na Lei 38/2003, de 17 de novembro, ou na Lei 9/2007, de 13 de xuño, de subvencións de Galicia, séndolle de aplicación o cadro de sancións previstos nas normas citadas e na ordenanza provincial de desenvolvemento que resulte aplicable.

3. Para os supostos de retraso na realización das actividades ou retraso na presentación da xustificación se estará ao disposto na ordenanza provincial de desenvolvemento que resulte aplicable.

XII.- INCORPORACIÓN AO REXISTRO PÚBLICO DE SUBVENCÍONS E PUBLICACIÓN DA SUBVENCIÓN CONCEDIDA

1. No cumprimento do disposto no artigo 20.1 da Lei 38/2003, Xeral de subvencións, e demais normativa de desenvolvemento, os datos da subvención concedida e a identificación do Clúster serán remitidas á Intervención xeral do Estado, para que sexan incorporados á Base de Datos Nacional de Subvencións, coa exclusiva finalidade prevista en dito precepto e co debido respecto á protección dos datos de carácter persoal, segundo o previsto na Lei orgánica 15/1999, de 13 de decembro.

2. Asemade, no cumprimento do disposto no artigo 16.3 da Lei 9/2007, de 13 de xuño, de Subvencións de Galicia, a Deputación remitiralle a mesma información á Consellería de Economía y Facenda, co fin de que a incorpore ao Rexistro público de axudas, subvencións e convenios da Comunidade Autónoma de Galicia.

3. Segundo o previsto no artigo 18 da Lei 38/2003, de 17 de novembro, Xeral de subvencións, a concesión da subvención ao Clúster será publicada no Boletín Oficial da Provincia da Coruña e na páxina web www.dacoruna.gal

4. Un exemplar deste convenio, debidamente asinado, será incorporado ao Rexistro de convenios que depende do Servizo de Contratación da Deputación.

XIII.- VIXENCIA DO CONVENIO, PRÓRROGA OU MODIFICACIÓN

1. O presente convenio de colaboración terá carácter retroactivo para os efectos de imputación dos gastos e abranguerá os devindicados desde o día **1 de xullo de 2024 ata o 31 de decembro de 2025**, sen que en ningún caso sexan subvencionables os gastos

devengados con anterioridade á dita data e conservará a súa vixencia ata o **31 de marzo de 2026**, sempre e cando exista crédito para tal fin.

2. Previa solicitude do Clúster, realizada alomenos dous meses antes da data indicada anteriormente, o convenio poderá ser prorrogado por acordo expreso de ambas as dúas partes tomado antes de que se expire a súa vixencia inicial e previos os informes preceptivos da Unidade xestora, da Secretaría e da Intervención da Deputación.

3. Tamén por acordo expreso de ambas as dúas partes e por causa debidamente xustificada, e previos os mesmos informes no apartado anterior, o convenio poderá ser obxecto de modificación.

XIV.- NATUREZA, INTERPRETACIÓN, MODIFICACIÓN E XURISDICCIÓN COMPETENTE

1. O presente convenio ten natureza administrativa e para resolver as dúbidas que xurdan na interpretación das súas cláusulas aplicaranse as disposicións contidas na Lei 38/2003, de 18 de novembro, xeral de Subvencións, e na Lei 9/2007, de 13 de xuño, de Subvencións de Galicia. Supletoriamente aplicárase a lexislación de contratos do sector público.

2. Para o seguimento coordinado da execución do presente convenio crearase unha comisión de seguimento formada por dous representantes de cada unha das institucións nomeados polo Presidente da Deputación e polo Clúster, respectivamente.

3. Corresponderalle aos órganos da xurisdición contencioso-administrativa, segundo a distribución de competencias disposta na Lei 29/1998, do 13 de xullo, reguladora de dita xurisdición, o coñecemento das cuestións litixiosas que poidan xurdir como consecuencia do presente convenio.

Faise constar que o presente convenio foi aprobado por acordo do Pleno corporativo o día 24de xullo de 2025.

E, en proba de conformidade, as partes comparecentes asinan en exemplar duplicado o presente convenio, no lugar e data indicados no encabezamento.

**EN REPRESENTACIÓN DA
DEPUTACIÓN PROVINCIAL DA CORUÑA**

Asdo. Rosa Ana García López

**EN REPRESENTACIÓN DO CLÚSTER
DO AUDIOVISUAL GALEGO**

Asdo. Alfonso Blanco Bembibre

**O SECRETARIO XERAL DA
DEPUTACIÓN PROVINCIAL DA CORUÑA**

Asdo. Miguel Iglesias Martínez